

UDHËZIM
Nr. 394, datë 21.8.2014

MBI PROGRAMET E ZHVILLIMIT EKONOMIK TË SHOQËRIVE TREGTARE ME KAPITAL SHTETËROR

Në zbatim të ligjit nr. 8885, datë 22.4.2002 “Për disa ndryshime në ligjin nr.7926, datë 20.4.1995 “Për transformimin e ndërmarrjeve shtetërore në shoqëri tregtare”, të ndryshuar, ligjit nr. 9901, datë 14.4.2008 “Për tregtarët dhe shoqëritë tregtare”, me qëllim njësimin e procedurave të hartimit, shqyrtimit dhe miratimit të programeve të zhvillimit të shoqërive, ku Ministria e Zhvillimit Ekonomik, Tregtisë dhe Sipërmarrjes është përfaqësuese ligjore e pronarit shtetëror, miratohet udhëzimi që vijon:

I.Procesi i hartimit të programeve të zhvillimit ekonomik

1.Programe të zhvillimit ekonomik hartojnë të gjitha shoqëritë publike me kapital tërësisht shtetëror.

2.Hartimi i programeve të zhvillimit ekonomik të këtyre shoqërive bëhet për periudha 1-vjeçare, afatmesme dhe afatgjata, në përputhje me objektivat e caktuar nga organet drejtuese të tyre.

3.Hartimi i programeve të zhvillimit ekonomik mbështetet në Strategjinë Kombëtare të Zhvillimit Ekonomik e Social, në strategjitë sektoriale përkatëse, si dhe në aktet ligjore e nënligjore në fuqi.

4.Hartimi i programeve vjetore të zhvillimit ekonomik kryhet nga drejtoritë dhe miratohet nga këshilli mbikëqyrës.

5.Programi i zhvillimit ekonomik, së bashku me vendimin e këshillit mbikëqyrës të shoqërive me kapital shtetëror, përcillet për miratim përfundimtar në MZHETS.

6.Për shoqëritë strategjike, portet dhe shoqëritë që subvencionohen nga ministritë e linjës administrative, pas miratimit nga këshilli mbikëqyrës, do të kërkohet mendimi i ministrive përkatëse. Projektprogrami i shoqëruar me vendimin e këshillit mbikëqyrës dhe prononcimin e ministrisë së linjës administrative do të përcillet për miratim përfundimtar në MZHETS.

7.Programi i zhvillimit, në shoqëritë ku shteti zotëron mbi 50 për qind të paketës së aksioneve, miratohet paraprakisht nga këshilli mbikëqyrës, i cili ia paraqet për miratim përfundimtar asamblesë së përgjithshme të aksionarëve të shoqërisë.

8.Programet e zhvillimit ekonomik, në shoqëritë ku shteti zotëron nën 50 për qind të paketës së aksioneve, shqyrtohen dhe miratohen nga asambleja e përgjithshme e aksionarëve. Përfaqësuesi i autorizuar i aksionarit shtetëror në mbledhjen e asamblesë, shpreh qëndrimin zyrtar përkatës të Ministrisë së Zhvillimit Ekonomik, Tregtisë dhe Sipërmarrjes.

II.Procedura e miratimit të programeve të zhvillimit

1.Programet e zhvillimit ekonomik të shoqërive me kapital shtetëror miratohen përfundimisht nga Ministria e Zhvillimit Ekonomik, Tregtisë dhe Sipërmarrjes, me cilësinë e pronarit të pronës shtetërore.

2. Praktika e projektprogramit, që propozohet për miratim përfundimtar në MZHETS, duhet të përmbajë:

-Tabelën me treguesit kryesorë të programit të zhvillimit, për vitin programues dhe parashikimin për dy vitet pasardhëse.

-Relacionin shpjegues të administratorit të shoqërisë, mbi projektprogramin ekonomik që propozojnë për miratim.

-Vendimin ekëshillit mbikëqyrës mbi projektprogramin ekonomik.

-Mendimi i ministrive të linjës administrative për shoqëritë e specifikuar në pikën 6 të këtij udhëzimi.

III. Afatet e hartimit, të shqyrtimit dhe miratimit të programeve të zhvillimit

1. Ministria e Zhvillimit Ekonomik, Tregtisë dhe Sipërmarrjes, brenda datës 30 shtator të çdo viti, u dërgon shoqërive udhëzimin metodik me treguesit kryesorë që duhet të përmbajë hartimi i programit të zhvillimit ekonomik për vitin pasardhës.

2. Drejtoritë e shoqërive, ku shteti ka mbi 50% të aksioneve, hartojnë projektprogramet dhe dërgojnë kopje të tyre, me relacion shpjegues pranë këshillave mbikëqyrës, brenda datës 1 nëntor të çdo viti.

3. Ministritë që përfaqësojnë linjën administrative të shoqërive strategjike, portet dhe shoqëritë që subvencionohen nga këto ministri, pasi i shqyrtojnë programet e zhvillimit, formulojnë qëndrimet përkatëse për treguesit kryesorë të tyre, brenda datës 30 nëntor të çdo viti.

4. Drejtoria e Administrimit të Pronës Publike në Ministrinë e Zhvillimit Ekonomik, Tregtisë dhe Sipërmarrjes, brenda muajit dhjetor të çdo viti, monitoron dhe shqyrton praktikën e projektprogrameve të zhvillimit ekonomik, të propozuara nga organet drejtuese të shoqërive.

5. Ministria e Zhvillimit Ekonomik, Tregtisë dhe Sipërmarrjes miraton projektprogramin e secilës shoqërie me pjesëmarrje mbi 50% kapital shtetëror, brenda datës 30 janar të çdo viti.

6. Për raste të veçanta, kur propozohen ndryshime në programin e miratuar nga MZHETS-ja, ndiqet e njëjta procedurë për miratimin e ndryshimit në programin e zhvillimit, si në rastin e miratimit të programit fillestar të shoqërisë. Nëse ndryshimet në programin ekonomik të zhvillimit konsistojnë brenda zërave të miratuar nga MZHETS-ja, miratimi i këtij ndryshimi bëhet vetëm me vendim të këshillit mbikëqyrës.

Udhëzimi nr.315, datë 8.4.2009 “Mbi programet e zhvillimit ekonomik të shoqërive tregtare me kapital shtetëror” shfuqizohet.

Ky udhëzim hyn në fuqi menjëherë.

MINISTRI I ZHVILLIMIT EKONOMIK,
TREGTISË DHE SIPËRMARRJES
Arben Ahmetaj